

四庫全書

史部

欽定四庫全書

至元嘉禾志卷十

元 徐碩 撰

寺院

錄事司

報恩光孝禪院在郡治北一里

考證舊施水院也宋治平間本州慕容殿丞請於
朝至熙寧元年賜名壽聖院崇寧二年賜名崇寧

寺政和六年改名天寧萬壽院紹興七年改名廣孝院紹興十三年改今名

精嚴寺在郡治西北一百八十步

考證晉成帝時徐尚書別業

尚書按舊靈光寺實錄名帖今土地記名

熙因夜井發光遂奏請捨宅為寺賜名靈光錢文

穆王時立山門掘地得一小龜介甲分明尾繞身

一匝遂改為靈龜寺天福四年陞縣為州時勅本

寺應瑞吳越呈祥天下不許改額復名靈光宋祥

符中賜今額元有沙門洪敏靈光寺碑記今石刻
不存寺之西北有五臺山內石經屋一十二間刻
法華維摩等經又有大藏殿東西塔廚混室淨土
水陸諸院千佛羅漢大悲天王諸堂自建炎兵火
後石經獨存餘者悉更新之又有木紋觀音殿咸
通年間立至今飛禽不立未鐫造前其木在水濟
人遇淨即浮逢羶即沉人知不凡取為尊像鐫製
纔畢面目手指皆有紋彩時人稱為木紋觀音其

殿在五臺山西南兵火後移於寺之東廡紹興十一年境內雨暘失時邦人禱之歲以有年於是鳩工度材而重立之凡遇水旱則郡侯必先率同僚請禱焉以為常

招提院在郡治西二里

考證唐光啟四年曹刺史捨宅為院賜名羅漢院宋治平四年改今名寺有靜照堂今廢

兜率寺在郡治東北一里

考證舊放生池也唐乾元元年置名法空寺錢氏
改為輪王寺宋大中祥符元年賜名兜率德祐元
年廢為教場今為北營

慈恩寺院在郡治西北一里楞嚴寺之西

考證唐開寶六年漢南王時攝刺史丁太尉在任
買磚塔一所尋掘塔基得石無量壽佛一石相輪
一石香爐一舍利一龕一因立為無量壽塔院宋
治平年中賜今名

普濟院在郡治西北一里慈恩寺之西南

考證元名金魚寺以刺史丁元贊得金魚於池而池在寺之前故以名宋大中元年賜今名後移往華亭作衛尚書功德院遂廢

楞嚴院在郡治西北二里三十步慈恩寺之後

考證本受業精嚴因遺火焚毀元地充米倉有昔許射廨宇宋嘉祐八年百姓鈕咸有地在慈恩塔東因舍入本院熙寧年間有旨一應寺院未有名

額有屋及三十間者並以壽聖為額僧無擇已造至三十四間遂有請於提刑未明闕之於朝存之後僧永和在院講楞嚴經蔡丞相書楞嚴牌揭之門遂以楞嚴為名

祥符院在郡治西北二里

考證宋乾寧元年置為水陸院大中祥符元年賜今名舊為律寺紹興二十五年守臣林衡奏請改為禪院

資聖院在郡治西北二里一十步

考證唐會昌五年建當年廢大中年間重置其院
在城外乾寧三年移入城內有唐宣宗書扁額尚
存

興聖禪院在郡治東北二百步

考證舊嘉興縣丞龐揮塵錄云宋孝宗誕育於此
時有紅光燭天嘉定戊辰賜今額理宗御書流虹
聖地興聖之寺八字寶祐年間因經回祿不存後

再造未完

金明寺在郡治西南三里

考證宋乾道八年移海鹽縣空閒金明寺額建開禧元年賜今名

寶花尼寺在郡治西南二百步

考證唐陸宣公宅也大歷中因女叔法興誦法華經感之天花亂墜寶雨兩下外祖秘書監遂捨宅為寺因名寶花法興亦為尼

惠安尼寺在郡治西二百五十步

考證古傳蕭王捨宅為之唐光化間名興善院宋祥符元年改今名

多寶尼寺在郡治西南一里三十步

考證唐肅宗朝置本名甘露寺宋治平元年賜今名

報天尼寺

考證宋郡守劉漢傑夢觀音因得女生數歲不茹

輦遂捨宅為寺

松江府

普照寺在府西二百八十步

考證唐乾元中建名大明寺宋祥符間改今額寺
有陸將軍祠世傳地本陸氏園亭因祠焉固未可
信嘉禾詩文謂陸機捨宅為寺亦妄矣機死於晉
大安二年寺建於唐乾元年間豈得為捨宅乎恐
子孫捨宅亦未詳晉史世說叙錄機之子蔚復同

父遇害於洛中又機故宅在華亭谷東崑山下非
今邑中也寺有地方天王祠吳越王加封護國石
刻存焉沈存中筆談載雷震天王寺屋柱倒書曰
高洞楊雅一十六人火令章凡一十一字內令章
兩字特竒勁似唐人書體今石刻尚有即此寺天
王堂也寺東北隅有善住教院傳賢首宗西北隅
有梵修院

寶相寺在府西南三百步

考證本清禪尼寺唐乾符間造宋大中祥符元年
賜今額

超果寺在府西南三里

考證本名長壽唐咸通十五年心鏡禪師造按唐
會要洛陽伽藍記武后以齒髮既老造長壽寺於
東京改元長壽又高僧傳載心鏡禪師藏真蘇州
華亭人會昌廢寺大中復修洛下長壽寺敕真居
焉真後嘗歸鄉造寺豈此復名長壽寺乎盧仝集

訪曦上人詩有三入寺曦未來及含曦答詩長壽寺下壁盧仝一首詩之語上川先生居洛城裏則長壽寺固其常游也今乃以仝詩為在華亭則妄矣宋治平間改今額有觀音大士像寺有石刻六本錢武肅王宮中所祈禱者太平興國中錢氏歸國僧慶依得之未知所適一夕夢白衣人告曰吾與若偕之雲間既寤乘舟而來將至縣西大士舒祥光下貫超果遂迎以祠焉至今雨暘皆禱之寺

有天台教院按芝園集雲間超果十方

嚴湛創建有陳舜俞為之記寺有見遠亭名公有

詩

興聖院在府東南二百步

考證按孤山閒居集載興聖院結界序漢乾祐二

年邑人張瑗之子仁捨宅為寺名興闕長壽宋祥

符中改覺玄院後改今額寺有宋仁宗嘉祐中宣

賜藏經

證覺教院在府西南一百五十步

考證宋太平興國間立本無礙浴院大中祥符元年賜今額

演教禪院在府南二里

考證宋崇亨中頭陀張其姓者卜築於此掘土得木雕住母羅漢十有六軀邑人異之遂為施水庵至紹興二十九年正月十八日請今名莫濤為之記

淨居禪院在府東北三百步

考證宋紹興五年請今額

廣化漏澤院在府西南二里一百步

考證宋紹興三年請今額

延慶教院在府東南三百步

考證寺址本施家港宋隆興間僧守詳創茅廬且

以衆力闕十六觀堂乾道間始賜今額至開禧間

悉燬開慶己未僧思恭始議修建自庚子迄丁卯

殿閣堂廡廚庫悉完美又有忠訓陳君文燧因感
夢得男又捨所住宅移建於寺西荒址為楹百餘
規模甚整備郡境是刹為最

總持寺

馬祈寺

清修寺

普光寺在府西北七十里薛澱湖

考證寺在湖中山頂宋建炎元年請今額

靜安寺在府東北一百里

考證元滬瀆也按寺記吳大帝赤烏中建號滬瀆
重玄寺佛法入中國雖始於漢而吳地未有寺也
赤烏十年僧康會入境孫仲謀始為丘寺建業曰
建初建初者言江東初有佛法也豈滬瀆寺相繼
創建耶景筠石幢記中間號永泰禪院宋祥符元
年改今額釋迦方志云晉建興元年有二石像浮
於吳松江口吳人朱膺等迎至滬瀆重玄寺像背

題曰維衛曰迦葉

闕

陵集建興八年漁者於滄瀆

沙汭獲石鉢以為白類葷而用之佛像見於外漁者異之乃以供二聖佛與鉢皆在平江府開元寺有毘盧遮那佛吳越王瑜迦道場中像佛五藏皆書錢氏妃嬪名氏又有陳朝檜皮日休陸龜蒙皆有重玄寺雙檜詩

圓智寺在府北二十九里于山

考證舊名禪居按宗毅寺記唐大中十三年建於

邑西南二里晉天福中水壞寺基始遷於此宋太平興國中都水使錢綽始建造堂宇有僧憲蟾入天台韶國師室來住北寺人多歸之精舍始完備朝廷賜蟾師號曰崇惠明教治平中賜今額

寶雲寺在府南三十五里

考證初名法雲寺在顧亭林市西北隅唐大中十三年建晉天福五年湖水壞寺基始遷寺南高基即陳顧黃門故宅按亭林法雲寺感夢伽藍神記

云開運元年造寺成其夜三更夢二人青衣來云
梁朝侍郎至也忽見紫衣金魚儀容清秀謂曰此
吾故宅荒已久矣師今造寺於上請立我像吾當
護此寺明日道珍智暉各言所夢其事不異明夜
復夢云但尋舊寺基水際古碑文為記二人明旦
求之果見皆文字破滅獨一片分明云寺南高基
顧野王曾於此修輿地志二人嘆曰此寺當興冥
感如此遂於東偏別選良材建屋立像并二青衣

侍衛是年季冬望日也其夜衆咸夢神來謝曰吾
獲其利皆師之故也凡有吉凶無不預報宋治平
賜今額後廢遂請是額於俞塘北為尼寺

金寺在府西北八十五里地名大盈

考證唐太和二年建本法雲禪院宋治平元年易
今額紹興間復為禪院寺有陳舜俞經藏記

空相寺在府東北八十里

考證元龍華寺張仁泰請於錢忠懃王始建宋治

平元年改今額西北隅有白蓮教院

隆平寺在府北五十四里青龍鎮

考證元名報德寺唐長慶元年造

勝果寺在府北五十四里青龍鎮

考證寺有沈光碑紹聖中呂益柔撰妙悟大師希
最塔銘云最學天台教緇林號曰義虎後居勝果
寺僧房有鬼物為祟最為講說於空中得朱書數
十字自謂漢朝烈士沈光大畧悔過謝罪之語事

頗近怪故不詳載

白蓮寺在府西五十四里

考證宋紹興二十六年請今額

寧國寺在府東北四十五里

考證宋乾道二年請額

大明寺在府西北四十五里

考證宋紹興三十一年請今額

普門院在府東五十里地名盤龍

考證唐大中十二年邑人陸素建本名觀音院宋祥符元年賜今額寺有名天王舊傳因大水漂至人多禱之

興塔院在府西南五十四里

考證宋紹興四年請今額

崇福院在府東南五十四里

考證宋紹興四年請今額

方廣院在府南八十里柘林

考證唐咸通六年造按寺記蔡侍郎功德院宋建
隆中賜額延壽院治平元年改今額寺有蔡侍郎
祠蔡氏墳塋在寺之左右石幢猶蔡氏故物也

法忍院在府西南三十六里朱涇

考證即船子和尚覆舟處唐咸通十年建本名建
興院宋治平元年賜今額寺有船子和尚夾山會
禪師遺像至今祠焉

福喜院在府西北九十里地名趙屯

考證梁貞明六年僧智道立精舍晉天福二年賜
名尊勝院宋大中祥符元年改賜今額

明行院在府西北五十里南橋

考證晉天福五年里人蔣漢瑛造請於忠懿王始
名安和院至宋太平興國八年改賜今額

七寶院在府東北七十五里

考證元福壽禪院宋大中祥符元年賜今額寺有
五代時檜今已合抱

明心院在府北三十五里北橋

考證元華嚴院按錢武肅王立寺記都水使者錢
綽造武肅王以誦華嚴僧居之因以為華嚴院宋
治平二年賜今額

海慧院在府西六十里白牛鎮

考證宋建隆初里人姚廷睿以宅為寺初名興國
福壽院治平元年改今額姚即為伽藍神

普照教院在府西北三十六里

考證本余山東庵宋治平二年賜今額寺本聰道人所居因以為寺有聰道人塔在山頂寺有上方
曰月軒衆山環列其前盡絕境也

宣妙院在府西北二十四里

考證本余山西庵宋治平二年賜今額寺有上方
惠日院在府西北二十四里

考證本余山中庵宋雍熙三年立治平二年賜今
額

慈雲昭慶禪院在府西北二十里

考證本余山之靈峰庵有馬嶠禪師塔其銘曰禪師傳雲門正派大闡法席建立精舍復古寺額寺有金沙地芥子庵

普寧慧日院在府西北七十里

考證在孔宅寺有宣聖祠宋元豐間賜今額舊經云紹興五年也

太平興國禪院在府西南四十五里零

考證宋紹興二年請今額

寶勝禪院在府東四里

考證宋紹興六年請今額

慈濟院在海中金山絕頂

考證宋元豐間釋惠安造紹興元年請額

北延恩院

觀音慈報禪院在府北八十里

考證宋崇寧元年請省額淳熙三年參政錢公良

臣請賜功德院

永定禪院在府東北七十二里周浦

考證宋淳熙十四年請額

保安院在府西五十里泖西

考證宋乾道七年請今額

寶藏護國禪院在府西南五十四里舊經云六十里

考證宋紹興四年請省額

大聖院在府東五十四里

考證宋隆興二年請今額

報恩院在府西四十五里

考證宋乾道二年請今額

集福保國水陸禪院在府西南六十里白牛鎮東

考證宋淳熙九年請今額

淨上院在府東北七十里

考證宋乾道八年請額

延恩報德院在府西五里

考證宋紹興甲寅律師元偉即接待舊址為之守
臣劉徽制請於朝賜今額

至元嘉禾志卷十

欽定四庫全書

至元嘉禾志卷十一

元 徐碩 撰

寺院

嘉興縣

景德禪院在縣西五里

考證舊志云元焚化院宋建炎三年守臣程少卿
奏改今額按本院碑記其初寺基下是白龍潭凡

遇風濤危難或遇天晴有白光三道其僧行雲積
土填潭造塔三座於光起之處時人稱為三塔灣
嘉禾百咏詩注云昔有白毫光高數丈民以為祥
乃作寺有白龍潭在寺前龍潭事詳見溪潭門茲
不復載東坡昔過此畫竹於壁題詩云聞說神仙
郭恕先醉中狂筆勢瀾翻百年寥落何人在只有
華亭李景元李亦畫竹於此以詩和之詩傳不全
有一聯云野人不識天人面知是虞皇第幾元李

華亭名士也又按本院碑記錢氏賜額為保安院
宋景德年間每州各立景德院遂以保安院改今
名宣和年間燬大觀年間重建

真如院在縣南四里

考證唐至德二年立大中十年裴相休舍宅為寺
改為至德院無着大師住持而雪峯和尚住庵庵
有雪峯井宋大中祥符元年改今名有蔡元長周
開祖范德鎮留題小石刻建炎初知州趙叔近龍

圖以王事死殞於中因鐫贈卹之詞於僧房鄉人為立祠宣和庚子兵火其寺僅存遺址後拆為三南則立為賢首教院淳熙二年僧戒月又建華嚴閣於其西閣下為十六觀堂焉商逸鄉為之記慶元三年十月又建寶塔於其北鮑義叔為之記其餘基址官立為寨後廢丙子兵火賢首教院亦燬

東塔廣福教院在縣東六里

考證舊大聖塔院也宋政和六年因在城壽聖教院改為天寧萬壽寺郡聞於朝以壽聖教院名就塔院立之紹興三十二年改今名按揮塵錄孝宗初時嘗登鐘樓誤行至中間竟墜於地旁觀失色孝宗屹然不動

本覺禪院在縣西二十七里

考證舊名報本宋宣和年改神霄玉清萬壽宮建炎元年復舊額此正樵李之地今有樵李亭東坡

與文長老往還嘗遊於此有東坡館按東坡集有
秀州報本禪院鄉僧文長老方丈詩曰每逢蜀叟
談終日便覺峨眉翠掃空洎再過之則文長老以
老病而退院復有詩云愁聞巴叟卧荒村來打三
更月下門三過之則文長老已卒詩曰三過門中
老病死一彈指頃去來今故寺有三過堂

惠寂院在縣東一十八里

考證唐乾元間創會昌間廢咸通六年復立咸通

九年為光福院長興三年有寧海僧栖法紹光聞於吳越文穆王重立宋治平元年十月賜名惠寂崇奉靈感觀音大士香火聖像得於杭人張嵩家藏昔石晉天福間有僧道翊一夕見天竺山間光明得竒木命匠者孔仁謙刻觀音像吳越忠懿王夜夢白衣仙人求治其居左右曰天竺觀音白衣像也乃一新道場此鄉耆舊相傳惠寂觀音大士與天竺同一木既聖像自杭得之則不為無所事

矣邦人歲遇潦祈之必應與天竺均此靈感宋慶
元丁巳澶淵王浦之來牧是邦時適閔雨嘗迎請
大士入州治未至而雨已霑足繼命僧師源寫相
述記併刊諸石嗣是邦之守臣凡遇雨暘豐凶無
不隨禱而應遠近賴之丙子兵劫一燬無幾僅存
山門水陸院而已昔之題詠碑刻皆亡近寺僧了
悟等模倣雕刻架造殿宇隨宜具體規制不古矣
能仁院在縣西北二十七里

考證舊名福業院唐武宗會昌五年廢宣宗大中二年給元額五代石少主開運二年改為報國院宋真宗大中祥符元年改承天院徽宗政和七年改今名

智覺院在縣南二十六里

考證舊為營田都務宋開寶八年立為梵刹咸平六年賜太平天壽院治平元年十月二十七日改今名

淨相寺在縣東南三十六里

考證梁武帝賜額為梁福寺後廢漢南王重立天
福七年武肅王重修祥符戊申改今名

保聖院在縣東南二十七里

考證唐至德二年立寺基獲石佛四軀因置石佛
院宋天聖元年五月賜今名

興善院在縣東南三十里

考證梁天監二年置周顯德五年改報恩院宋治

平元年改今名

淨衆寺在縣東四十里

考證宋乾德二年百姓李德榮捨宅為大聖寺治
平二年十月改今名

淨土院在縣東三十六里

考證邑人陸求宅基也曾收得唐咸通十二年石
幢至清泰元年奏漢南王捨宅為安福寺宋祥符
元年賜今名內有亭名碧鮮竒絕聞人郎中安道

常作詩以紀其事云植竹敞虛亭清幽滌襟慮盛
暑生涼陰窮冬見蒼翠我愛主人賢堅如筠箭美
願師持此心與境長無魏陳賢良亦有詩云瀟洒
闌干碧玉叢昔來游賞是兒童縈迴修竹探繁影
刻劃新詩逸翠筒十載雪霜林色改幾番風月酒
尊空子猷老去心長在終擬為鄰作醉翁

大聖院在縣東北三十六里魏唐鎮

考證宋熙寧八年四月開山元豐二年立紹聖元

年有大聖菩薩在寺放光明崇寧二年八月八日
省符改是名今廢

慈雲寺在縣東北二十六里魏塘鎮

考證唐大中十一年立名保安寺宋治平元年十
一月改今名

景德院在縣東北三十六里魏塘鎮

圓通寺在縣東三十六里

考證元有荒廢寺基周顯德五年百姓茆承翰申

漢南王乞於古跡寺基立名寧國寺宋治平元年十一月改今名

白蓮接待院在縣東八里

考證郡城元有白蓮寺舊傳有知州為士人時過此求湯水寺僧不允後果典是邦遂廢此寺後為趙倅雋之錦莊宋紹興二年郡父老請於朝因以是額立於此

泗州大聖院在縣北四十五里

考證宋熙寧間有僧智微在永州兜率寺受業其
僧母張氏年九十四歲造庵一所名泗州大聖庵
知州吳司文聞於朝得曾太后旨賜老人粟帛僧
智微同母將所賜粟帛并衣鉢貸易造泗州大聖
像及佛殿紹興三年智微從弟奉珍以其狀申州
轉聞於朝准禮部符改今名

永興禪院在縣東三十里胥山上

考證宋隆興元年李觀察捨俸資為寺以胥山鄉

永興禪院舊額請於朝立之

淨因院在縣東二里

考證宋建炎兵火此院獨存天台寧海尉聞人偲
紀其事云湖海浮家二十年重來春色尚依然杏
花籬落噴紅霧楊柳林塘護綠烟草煖邦人出遊
地鳩鳴刺史勸耕天覺場獨在三災外試問支郎
第幾禪

漏澤院在縣東二里三十步

考證宋崇寧三年置賢良陳舜俞孫捨基為之

龍華寺在縣西北一十里今廢

海鹽縣

資聖寺在縣西五十步

考證舊經云本普明院舊記云昔右將軍戴威之宅一日井中發五色光威以為竒遂捨宅為寺司徒王詢建為伽藍神得名光興事見吳郡陸崧塔記乾祐中改重光宋祥符中改普明天禧二年改

今額

悟空寺在縣西南四十里

考證本永安寺宋治平元年改今額

德藏寺在縣北五十五里當湖市

考證唐會昌元年立光啟初廢後唐清泰中鄉民
丘邵請即故居新之名曰寶興宋大中祥符間改
今名景祐初復葺之隆興二年重修廊宇魯衢為
之記

普明寺在縣西南三十里

考證本僧伽院宋治平元年改今名

法喜寺在縣西南三十里

考證本通元寺宋祥符元年改今名紹興九年改
禪寺有準高僧塔其詳載古跡門政和間有村媪
捨幡入寺寺僧以無挂幡錢遣去過寺西橋忽遇
貧僧問而憐之為入寺引臂挂幡於刹竿隨即無
蹤相傳以為羅漢顯化

鹿苑禪院在縣西北三十五里今廢

考證本金明寺宋治平元年改賜今額寺有一擊
軒及何源清公應夢羅漢景德中魯簡肅公諱安
道初宰此邑夢胡僧來迎叅政及瞻羅漢像與所
夢符合施俸修寺因榜曰應夢尊者後竟叅大政
以是立祠有無為楊傑留題進士聞人闕嘗作詩
紀其事云郡邑相望路半停屹然香刹聳林坳罷
叅釋子忘情久應供胡僧入夢靈東去無情水繚

繞西來有意柏葱青定知俗駕經過少月上松扉
不用局

青蓮寺在縣北四十里

考證本名石佛寺宋治平元年改賜今額

祇園寺在縣北八十里

考證本建明寺宋治平元年改額

大寧永祚禪寺在縣西三里

考證本禪院宋宣和二年改今名

福業教院在縣西南二里

考證本華嚴庵焚化院宋紹興五年改今額

普照院在縣東北九十里

考證本僧伽院宋治平元年改今名

萬壽院在縣東北九十里

考證本保國勝刹院宋大中祥符元年改今名

寧海院在縣西二十五里

考證宋紹興六年改今額

禪悅院在縣西南三十六里

考證本行香庵宋靖康元年改今名

福臻院在縣北四十里

考證宋紹興六年改今名

南塔院去縣三十五里

考證本觀音所禱去處宋建炎四年三月改今名

淨業院在縣西南一里

考證本無礙浴院宋治平元年改今名

廣福教院在縣北七十步

考證本施水院宋熙寧元年改壽聖隆興元年改

今額

廣惠禪院在縣西三十六里金粟山

考證宋開寶己巳錢武肅王號施茶院祥符元年

改今名紹興二十五年七月內降下御書法帖一

十軸於本院奉安

禪寂院在縣西南五十里橫山

考證本興福院宋治平元年改賜今額祠顧況為
伽藍神況舊居寺側故也況詩云家住雙峰蘭若
邊

西林院在縣北五十里

考證宋紹興五年改賜今額

興福院在縣東北四十里陳山

考證宋紹熙四年縣令李直養既鼎新龍祠又移
廢寺額創立伽藍以廣僧居以祠龍居

淨福院在縣西一里

考證本西焚化庵宋銘熙四年移請廢額立焉

海寧院在縣西南二十里

考證宋紹興十四年就法喜寺

闕

賜是名今

廢

崇德縣

福寺在縣西八十步

考證梁天監二年名常樂寺唐會昌年廢大中十

年重立宋大中祥符二年改為悟空院天禧二年
六月十五日改今名建炎兵火廢後重立有唐無
着禪師贊寧碑記師嘉禾禦兒人也寺東北隅有
九品觀堂

廣法寺在縣東北三百步運河東

考證唐咸通九年建名修證宋治平元年改今額
寺有景祐元豐法堂浴堂碑記建炎乙巳之難茲
寺歸然靈光也

南廣福尼寺在縣東南二百步運河東

考證本梁朝天監古寺唐開平二年置名寶壽宋
治平元年改壽聖紹興三十二年改今名

北廣福尼寺在縣西北二百步

考證本梁朝天監古寺晉天福八年修置名妙善
宋治平四年賜名壽聖紹興以後次第重建壬午
上徽號名同者易之淳熙四年改為十方禪刹

西常樂教寺在縣西北三里

考證宋建炎兵火廢紹興五年重建

祇園寺在縣西北三十五里洲錢村

考證舊經云本梁朝天監古寺周廣順三年修置
為大喜寺宋大中祥符元年改今名殿西南隅有
梁朝檜皮剝殆盡堅逾鐵石虬枝奮起若爪距擎
攬附根於榦倒偃蒼蓋竒偉特甚朱勔之黨嘗加
緘護會臘寇作而止丞相趙福王祠在廡東

密印寺在縣西北六十里青鎮

考證梁朝置名吳德寺宋大中祥符元年改今額
舊有梁昭明太子祠蓋烏鎮普靜寺本梁相沈休
文父墓也當武帝時休文貴盛每歲春一來拜掃
其反也帝必遣昭明太子迎之遠郊因就築館宇
休文不自安遷葬金陵而舍墓為寺昭明亦以館
為密印寺其後二寺各祀以為護法伽藍神寺有
華嚴圖高一十二丈古有聖僧入定遊華嚴境界
寤筆諸圖妙入神品兩曾宣入經御覽今藏在寺

藏經亦異古有士子一十人忽來願書經既畢不告而去

妙智寺在縣東北五十里

考證宋嘉定間建

觀音資福院在縣西南一里

考證西廡有軒瞰流扁平綠

淨慈接待院在縣北一里

崇勝院在縣東南三里

考證晉開運二年吳越陪臣徐顛捨宅為之名法
華宋治平元年賜今名

靈濟院在縣東北三里

考證元謂之馬嶠庵宋嘉定移請今額

福嚴禪院在縣東北一十二里

考證唐乾符三年置為千乘院宋大中祥符元年
改今名先是真覺禪師志添雲遊至京師徽宗時
在潛邸陳太后病目真覺呪水治療有功許其指

占名山住持真覺乞來此是為本院第八祖所賜
金環磨衲袈裟一條上題遂寧郡王陳美人願福
壽延長施真覺道者當來同成佛果二十三字師
有草庵歌元祐乙巳黃山谷為之書今皆藏在院
又真覺請到汀洲定光佛專為祈禱道場雨暘之
愆請禱輒應舊有七級浮圖久廢後重建

澄寂院在縣西北一十二里羔羊村

考證梁天監二年置為靜林寺開平二年改為雙

林院宋祥符元年改今名

演教院在縣東一十八里

考證晉天福八年置為保安院宋治平元年改今名

順慶院在縣北二十里東田村

考證宋淳祐間建

勝因尼院在洲錢南獅子墓

考證宋淳熙間建

徑山解院在縣北三十里大沐村

考證宋開禧間建

證聖院在縣北三十里錢林村

考證吳越錢王鏐徵時有舊館於此後貴改為祖祠已而道弘師庵於祠側王聞其道行孤高乾寧二年建寺居之曰寶林方丈後園亭扁清樂亭舊有池種千葉蓮園多語兒梨千乘無核棗歲獻錢王宋大中祥符元年改今名

廣福塔院在縣西北七十里青鎮

考證宋慶曆二年建為多寶佛塔至和中改為講院接待熙寧元年又改壽聖塔院紹興壬午改今名參政陳簡齋舊肄業於院既貴建閣以讀書名之簡齋與西庵大圓師洪智鎮士葉懋天經友善且命子洪從天經學閣遭鬱攸不存

惠雲院在縣北四十里鳳鳴市

考證周廣順二年漢南王建名鳳鳴院宋治平改


今名承平時有東京三藏道法師被旨奉真身佛
牙遊化至至本院欲求舍利永鎮一方爰集緇素
虔禱三之日丁夜舍利現人皆竒之雨暘有禱即
驗

寧國院在縣東北四十里

考證元龍吟寺本淮海王祠祖置為龍翔寺宋大
中祥符間改今名

寂照院在縣東六十里千金鄉屠甸村

考證經始不知何代晉天福間重建名國清報恩
院宋治平間改今名寺有二石佛溫潤如玉頂冠
冕被縵衣制度不凡古傳自海浮來類吳中開元
迦葉維衛二如來像



至元嘉禾志卷十一

欽定四庫全書

史部

至元嘉禾志卷十二至十五

詳校官編修臣曹振鏞

檢討臣德生覆勘

總校官降調編修臣倉聖脉

校對官編修臣沈清藻

謄錄監生臣李連城

欽定四庫全書

至元嘉禾志卷十二

元 徐碩 撰

宮觀 道院附

錄事司

崇道宮在郡治南一里

考證舊在南城外二里續移入城內古萬壽宮基
上初本名崇福宮宋治平元年改賜今額俗呼為

南宮宮有一枝堂每大比邦人士用取南宮一枝之識多會課於此今廢止有繼秀堂慵齋拙齋而已

天慶觀在郡治西北一里

考證本名同元觀梁文明元年立宋雍熙三年改棲真觀大中祥符五年置聖祖殿六年賜今額天禧元年降到天尊神化金寶牌子紹興元年知州鄧根因兵火復興聖祖殿二十六年再知州奉詔

如律而加備焉洛陽朱敦儒為之記嘉禾百詠詩
注七賢遺蹟一嚴陵陽燄二蹇子虔水三葛洪書
額四吳道子貌真五張僧繇鷹以致殿宇之上無
燕雀巢六顧虎頭神二為巢賊竊去七飛仙失名
字遭兵火後並無存者外有唐開元鐘梁朝檜七
寶上帝像宋乾道中門齋堂掘得二小石刻其一
北極殿記知州宋坦以俸金創殿雍熙三年五月
二十七日記其二并銘軍事推官解九臯擬徐鉉

茅山許表史并銘為之九臯鉉門下士也雍熙四年立

報忠觀在郡治西南一里半

考證宋淳祐九年里人趙朝散汝徘徊捨宅為觀淳祐十二年十月准勅賜今額

隱真道院在郡治東南六十步

考證宋崇寧間造建炎兵火巋然獨存或謂紹興初純陽真人到此故名隱真紹興丁卯又有仙人

劉高尚夜宿於中晨起援筆題雲堂柱間凡四十
有三字曰行方便坐方便諸聖察天上見得道安
得身健但能晨朝洗面水不得浪湍起盜玉津能
顯九霄雲事劉卞功來仙語隱微衆亦莫曉筆畫
透柱如點漆然郡人有疾者刮其字煎飲之即愈
端平改元闕棊記其事劉採為之讚李漢為之跋
後庸醫以新易舊刮墨和藥柱因不存

異親道院在郡治東北一里半

考證宋癸丑間雲游俞世脩患風疾其行匍匐其語蹇澀忽有道人北角美髯青褐大袖顏貌竒古以手重揮兩膝其疾頓瘳或謂鍾離真人至此也婺州道人毛觀記其事

萬壽道院在郡北一里

考證里人徐氏建崇奉梓潼真君香火歲大比邦人士禱焉

脩真道院在郡治西南一里

松江府

錢明宮在府東張塔橋側

仙鶴觀在府南二百步

考證東晉時創額宋紹興三十一年重建

谷水道院在府西南西湖上

真靖道院在府西北普照寺後

考證俗呼道堂

真武道院在府南

太清道院在震橋東

考證里人衛守宗武舍舊宅為之

嘉興縣

崇真道院在縣東四里

長生道院在縣東一里

海鹽縣

棲真觀在縣西北五十步

考證舊真武廟宋乾道二年道士郭宗諒移請廢

額為之

崇德縣

天清宮在縣西南一百步

考證元係東嶽行宮道院道士蘇大亨募緣增建
宋紹定四年請額開山

崇福宮在縣東北五十八里青鎮

考證宋紹興七年道士葉彥球建名奉直廢至二
十九年始創殿宇請今額

祠廟

錄事司

城隍廟在郡治西一里招提寺西

考證元在州樓上之東偏晉天福四年立後移於
此地守臣劉炳為之記

五聖廟在州樓上之西

考證又一在廣平橋又一在糖巷東北又一在郡
圃又一在舊抽木場西

天王堂在州子城西北樓上

考證唐天寶初令州郡於城西北隅置北方毗沙門天王像又置之佛刹舊精嚴寺亦有此堂

東嶽二聖廟

考證在天慶觀之東南又崇福宮之西

資善興福明王廟在郡治北精嚴寺之西北隅

考證本晉徐尚書宅因捨宅為寺遂祠之朝議大夫行開封府司士曹事侯銘為之記

曹使君廟在郡治西北二百五十步

考證按舊經云曹信當錢氏霸國時為牧守自臨
平鎮移蒞嘉興慈惠及民卒邑民追慕之相與列
狀乞立祠字春秋致享又按吳越備史云曹珪也
錢氏忠懿乾寧中淮人圍嘉禾珪與族人師魯守
之每登樓張樂縱飲石矢交至視之晏如也嘉禾
平以功援蘇州刺史今廟有三人碎碑在廟後磨
滅不可讀

普寧王廟在郡治北一里

考證俗呼銅棺廟舊傳嘉興知縣有善政天降一銅棺蓋自開知縣入焉蓋又自閤其棺飛在常州宜興縣山上今為銅棺山當時有一吏人堅挽知縣不可入遂折一臂後塑折臂曹司在其側

金山大王廟在郡治北一里半

考證本漢霍將軍光也詳見松江府

楊將軍廟在郡治北五十步

考證乾化元年置

王總營廟在郡治西三里通越門內

考證王因高田賊作以身死難故祠之加封旌忠廟

靈濟昭烈王廟在郡治西南一里半

考證舊在西門外宋德祐兵火後移於此即故知
惠州徐聞詩宅也今西門故址尚存

松江府

東嶽別廟在府西二里

靈濟昭烈王別廟在府西三里

考證神姓張其英槩靈迹載相川神祠碑記中蓋
自漢以來江浙多祀之縣之別廟始於宋淳熙之
八年

城隍廟在府東南七十步

考證舊在縣西宋政和四年遷於此唐李陽冰曰
城隍神祀典雖無吳越中多祠之今州縣城隍相

傳祀紀信云

金山忠烈昭應廟其一在海中金山去府治九十里其別廟在府東南八十步

考證廟有吳越王鏐祭獻文云以報將軍之陰德吳國備史云大將軍霍光自漢室既衰舊廟亦毀一日吳王皓染疾甚忽於宮庭附小黃門曰國王封界華亭谷極東南有金山鹹塘風激重潮海水為患下民將為魚鱉所食非人力能防金山北古

之海鹽縣一旦陷沒為湖無大神力護也臣漢之
功臣霍光也臣部黨有力可立廟於鹹塘臣當統
部屬以鎮之遂立廟歲以祀之宋宣和二年賜顯
忠廟五年封忠烈公建炎三年辛道宗領舟師由
海道護行在所奏加封忠烈順濟且賜緡錢以新
廟貌四年加封昭應按霍去病為冠軍將軍而霍
子孟為大將軍今備史以為霍光或者吳越祭文
不考也

廣衛將軍祠在府西普仁寺

考證寺有石刻載吳越王祭獻文云晉賢陸機之祖按吳志機之祖遜初拜撫邊將軍又拜鎮西將軍又拜上大將軍吳因漢志雖有雜號將軍而考之遜傳未嘗封廣衛之號若機曾祖紆守城門校尉高祖馭九江都尉亦未嘗位至將軍

陸司空廟在府南三里

考證祥符圖經云陸四公未詳所出今俗傳陸機

廟按晉史機未嘗為司空為司空者機之從兄弟
玩也又原化記云蘇州華亭縣有陸四官廟元和
初有鹽船泊於廟前守船者夜於廟中獲光明珠
則又以為陸四官矣

築耶將軍祠在府東三十五里

考證築耶城晉左將軍袁崧所築遺址尚存有築
耶將軍祠世傳祀袁崧按晉隆安四年崧以吳國
內史築滄瀆壘以備孫恩明年恩陷滄瀆崧死境

內祠之宜也築耶之義未詳

顧侍郎祠在府東南三十五里亭林法雲寺

考證感伽藍神記開運元年仲春十有一日寺成
僧道中智暉夢二青衣來云陳朝侍郎至也後忽
見一人紫衣金魚儀容清秀曰此地吾之故宅荒
已久矣師今於上造佛立寺請立吾形像吾當護
此寺也可尋舊寺基水際古碑為據明日二人各
言其所夢不異就求之果得古斷碑文字破滅云

寺南高基顏野王曾於此脩輿地志二僧於寺東
偏建屋立像至今祠焉

通濟龍王祠在府東北滄瀆

考證故老相傳自錢氏有國已廟食茲土宋景祐
五年太史葉清臣為本路漕司因浚盤龍滙禱於
故廟神應如響於是復新祠貌有葉太史祭文刻
石於廟中

蔡侍郎廟在府南八十里白砂鄉

考証據通幽記唐貞元五年在嘉興監徐浦下場
糶鹽官場界今諸場亦有蔡廟獨未詳何神柘林
方廣寺有蔡侍郎祠按寺記云自古相傳蔡侍郎
捨宅為寺竟無稽考惟石幢題云唐咸通六年蔡
贊造去父母塋九十步去壽域一十六步三代皆
當世文儒按貞元則德宗朝也咸通則宣宗朝也
貞元中已有蔡侍郎祠矣雖稗官小說未可盡信
不應咸通中蔡始造壽塋也豈寺之所祠與蔡場

所祠各不同乎

姚將軍祠在府西北十五步

考證初祠於證覺院宋政和四年始遷於此未詳何神

福順延德大王祠在府都酒務西

考證未詳何神廟有宋楊景範遷廟石刻云熙寧甲寅到官夢遊福順廟見執簿者臂頽求予治之未幾以漕命遷酒稅於王故宮之基乃用卜宅於

茲土豈神之靈先有以授我耶

三姑祠一在府南七十里

西北七十二里澱山湖

考證按吳地志秦時有女子入湖為神即此祠也
柘湖今陞塞為蘆葦之場神亦弗祠其澱山湖中
普光王寺三姑祠靈甚湖旁三數十里田者與往
來之舟皆禱焉故老相傳秦時人姓邢氏女兄弟
三人謂即柘湖所祠也

嘉興縣

城隍廟在縣治內

考證舊在縣西二十步晉天福四年立後移在縣
治內之東偏知縣李時習重脩

蕭王太祖廟在縣西北

考證唐贊云梁蕭氏興江左實有功在民故州縣
多祠之惠安寺即蕭王故宅也

五龍王堂在縣南城外三里

考證舊經云在縣西南五里宋天聖二年立隆興元年更創祠宇服色坐位出於俚俗不復討論禱而未應州學錄夏公以文選郭景純游仙詩言五龍事上之州知州姚憲從之遂改正其服位繼而響應祠宇之南偏乃焚化院嘗掘得大通年石佛像奉安之時光明滿室

高王菩薩廟在縣北三十六里遷善鄉

考證高使君也晉建武中出為監屯校尉領兵三

千屯給於此久而鎮靜使君教兵三千耕稼官田
歲遇豐稔公儲有餘於官於私有功有德使君累
遷黃門侍郎司徒左長史并侍中征虜將軍授北
海信都二郡太守禾之鎮終於此梁大通年立廟
於縣北二百步梁步兵校尉劉績之記後移其廟
於此地名江涇村

高豐縣在縣東北一十八里

考證唐屯田之所按文粹有嘉興屯田政績記李

澣為文其畧云浙西有三屯嘉禾為之大乃以大
理評事朱自勉主之且揚州在九州之北最廣全
吳在揚州之域最大嘉禾在全吳之壤最腴故嘉
禾一穰江淮為之康嘉禾一歉江淮為之儉首公
選於衆獨當其任有白雀集於高豐屯廩蓋大穰
之徵也則高豐之祠亦云舊矣今有雀墓村乃白
雀之墓也

昌武廟

考證舊志云不知何代人也吳錄異記曰吳士季為吳興令病瘧遣人就昌武廟乞斷鬼士季夢一騎縛小鬼去即愈

徐偃王廟在縣西二十里

考證偃王逃戰之會稽嘉興本屬會稽人多姓徐王之宗族嘗有散在邑者故後世因有思王功德者為之廟以祀焉衢州龍丘亦有廟韓退之衢州廟記甚詳唐開元元和中徐氏三人相繼作衢州

刺史乃王之遠孫也

楊姑廟在縣西

考證舊圖經云昔有楊氏女篤孝躬耕給養父母
死後鄉里為之立祠

許公廟在縣西一百步

考證舊經云許公名安仁晉黃門侍郎也

隋陳司徒廟在縣西南五里

考證唐咸通五年置郎隋陳果仁也唐封忠烈公

偽唐冊武烈帝常州亦有是廟有碑存焉

馬塘廟在縣南七里馬塘堰側

嘉禾大王廟在縣北望雲門外

蒲白廟在縣西北五里

考證舊傳是徐岱也

靈宿土地廟在縣西南二十七里本覺寺之東南

考證父老相傳始者里社欲立廟本非今處木植
既備一夕自移至此水旱禱之無不響應

靈顯侯廟在縣北五里

考證土神施府君也宋人諱伯成九歲為神幾百
餘年有禱輒應歲旱澇鄉貢進士聞人剛中等禱
於祠下遂獲大雨遂請於朝景定五年九月准勅
賜今額今廟之左右皆施族居焉本縣太平橋杉
青閘等處

海鹽縣

東嶽別廟在縣西北一百步

考證宋大觀四年造建炎四年正月關將領敗兵
入海避敵過海鹽謁東嶽廟關王祠見塑像卒持
刀柄離地出舊塑尺許衆畏之不敢為變而去紹
興三年縣令李直養重脩別建聖母殿於正殿之
東張椽為之記

城隍廟在縣南五十步

考證廟碑陳文惠公八分書宋乾道七年歲旱知
縣邢銖禱之而雨

廣惠別廟在縣南一里

考證宋紹熙二年文林郎紹興府察推蔡與義建
淳祐辛亥知縣何三壽再建

金山顯忠別廟在縣東一里

考證漢大將軍霍光祠封忠烈順濟昭應公宋宣
和間創建紹熙甲寅縣令李直養脩

陳山顯濟廟在縣東北四十里

考證宋大觀三年建舊圖經云以龍祠為大帝典

兩曹政和間縣人郭三益為中司以禱祈感應奏
請封爵山椒有龍母冢巨石盤陀山半有龍湫水
旱不溢不涸崇寧三年詔以顯濟名其廟宣和五
年封龍君為淵靈侯紹熙七年六月旱暵知縣李
直養因禱於龍君得小龍以歸就縣廳設醮三日
後果雨是歲大稔聞於朝進封龍君為廣惠淵靈
侯龍母為龍君夫人紹熙二年李直養建新龍君
龍母二大殿裝龍君像塑侍衛八軀塑龍母四龍

王像置供具繪龍於壁自廟門而下皆一新之紹
熙五年勅封龍君為廣惠淵靈威祐侯龍母為慶
善薦福夫人又創建興福院於廟之右以廣僧居
以嚴香火之奉其詳載廟碑

廣順延德大王廟在縣西二里半

蘇驃騎廟在縣西一百三十步

考證梁大同間立碑圖經云名舉字子羽封烏程
侯葬金牛山北宋高祖嘗夢其神因贈平南大將

軍明帝加使持節都督征北大將軍

黃郎中廟在縣圃

考證耆老相傳以為古之賢令因立此廟後廢宋
元祐間何清源公執中重建紹興二十九年林仰
脩紹興五年李直養重脩

白馬廟在縣東一十八里海沙場北

齊景公廟在縣東南三十六里

考證耆老云景公遵海而至此

尚胥廟在縣尚胥橋之北

考證伍子胥入吳至此後以忠死邦人憐之故并其兄尚祠焉因曰尚胥廟後孟勅封清忠英烈威惠獻王

太公呂望廟在縣東一百五十步

考證吳地志云太公避紂居東海之濱百姓懷之為立廟今廢

秦始皇廟在縣南一十八里秦住山

考證吳地記云秦始皇廟失其立廟年代時日山
有碑梁天監二年八月二十三日拊山上有秦佳

泉

金牛山廟在縣西南五十里

武寧威烈王廟在縣西一里半

張府君廟在縣東二里

崇德縣

東嶽行宮在縣西南一百步

考證宋政和間脩廟舊碑磨滅猶可讀謂淹時沒
久感夢興繕從知建立甚古又云廟屋百楹增脩
殿宇三所崇興庭臺連東西二所彩飾后嬪供帳
與夫百司執事從祀之神靡不備具繹騷之後再
創郡志止稱聖帝廟後之規模壯麗有加於前

城隍廟在縣西南隅語溪館東

考證邑令臧元士增創門道兩廊開路東出丘於
祠附於內

秦王廟在縣運河東北二百二十步

考證舊祠於廣法院後並祠廣忠

何律王廟在縣西三里

陳王廟在縣北八里

射獵廟在縣東南五里

打虎廟在縣南七里

通靈王廟在縣西北三十里

蕭尚書廟在縣東三十里

秦王行祠在縣北千乘鄉

東嶽行祠在縣北二十二里石門市

索度明王廟在縣東北六十里青鎮

考證青鎮土地神也宋宣和間起居舍人周維亨
謫蒞鎮事一夕夢有神人謁之曰予居弊陋幸公
惠顧我翼日周訪之叢祠得土像遶契夢中所見
者遂為脩祠宇萬珪為之記舊志謂索度王即吳
王孫權之子然鎮西南隅舊有索靖王廟考之唐

咸通中王洪所記索靖王實吳王孫權之仲子也
未知孰是

昌武三王廟在縣北車口堰地名下廟

至元嘉禾志卷十二